

LIGJ
Nr.8399, datë 9.9.1998

PËR DISA NDRYSHIME NË LIGJIN NR.7776, DATË 22.12.1993 "PËR BUXHETIN LOKAL"

Në mbështetje të nenit 16 të ligjit nr.7491, datë 29.4.1991 "Për dispozitat kryesore kushtetuese", me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

VENDOSI:

Në ligjin nr.7776, datë 22.12.1993 "Për buxhetin lokal" bëhen këto ndryshime:

Neni 1

Neni 1 ndryshohet si vijon:

"Buxheti lokal është programi kryesor financiar vjetor i organit të pushtetit lokal. Në të përfshihen të gjitha të ardhurat dhe shpenzimet e përcaktuara me ligj për kryerjen e funksioneve dhe përmbushjen e kompetencave që ka organi i pushtetit lokal në territorin ku vepron.

Çdo organ i pushtetit lokal ka buxhetin e vet. Buxheti lokal është unik dhe përbëhet nga pjesa e buxhetit të pavarur dhe pjesa e buxhetit të shtetit."

Neni 2

Neni 2 ndryshohet si vijon:

"Pjesa e buxhetit lokal të pavarur përbëhet nga të ardhurat dhe shpenzimet që, në përputhje me dispozitat ligjore, përfshihen në buxhetin e organeve të pushtetit lokal.

Këshillat e organeve të pushtetit lokal janë organet e vetme që, në përputhje me aktet ligjore e nënligjore, kanë kompetencë të vendosin për hartimin, miratimin dhe zbatimin e kësaj pjese të buxhetit."

Neni 3

Në nenin 3 shtohet një paragraf me këtë përmbajtje:

"Këshillat e organeve të pushtetit lokal nuk kanë të drejtë të ndryshojnë destinacionin fillestar të fondeve të buxhetit të shtetit."

Neni 4

Neni 4 ndryshohet si vijon:

"Viti buxhetor për pushtetin lokal fillon më 1 janar dhe mbaron në 31 dhjetor të çdo viti kalendarik."

Neni 5

Neni 6 ndryshohet si vijon:

"Të ardhurat e buxhetit lokal të pavarur formohen nga:

- a) të ardhurat nga burimet e brendshme lokale, në të cilat përfshihen:
- të ardhurat nga pjesa e taksave dhe tatimeve nacionale që me ligj derdhen drejtpërdrejt në favor të organeve të pushtetit lokal;
 - të ardhurat nga tatimi mbi pasurinë që me ligj u lihen organeve të pushtetit lokal;
 - të ardhurat nga taksat lokale;
 - të ardhurat nga tarifat e shërbimeve;

- të ardhurat nga veprimtaritë ekonomike në vartësi të pushtetit lokal, shpenzimet e të cilave financohen nga buxheti lokal i pavarur;
- të ardhurat nga gjobat, në zbatim të kompetencave të organeve të pushtetit lokal, si dhe nga të gjitha gjobat e tjera, kur këto u lihen sipas dispozitave ligjore organeve të pushtetit lokal;
- të ardhurat nga interesat aktive;
- b) të ardhurat nga ndihmat dhe kreditë, në të cilat përfshihen:
 - të ardhurat nga ndihmat e organizatave humanitare dhe ato që përfitohen nga marrëdhëniet që vendosen ndërmjet organeve të pushtetit lokal dhe homologëve të tyre brenda dhe jashtë vendit;
 - kreditë vetëm për investime, në përputhje me dispozitat ligjore;
 - të ardhurat nga dhurime dhe sponsorizime të ndryshme;
- c) të ardhurat nga buxheti i shteti, të cilat përcaktohen sipas ligjit vjetor të buxhetit të shtetit."

Neni 6

Neni 8 ndryshohet si vijon:

"Për të përballuar shpenzimet e paparishikuara në buxhetin lokal, krijohet fondi rezervë në masën jo më shumë se 3 për qind të totalit të shpenzimeve."

Neni 7

Neni 11 ndryshohet si vijon:

"Projektbuxheti për organet e pushtetit lokal paraqitet në prefekturë dhe në degën e buxhetit të rrethit, sipas procedurave të përcaktuara në udhëzimin e Ministrisë së Financave.

Prefektura, pasi i shqyrton nga pikëpamja procedurale e teknike projektbuxhetet e organeve të pushtetit lokal të juridiksionit të saj, ia dërgon Ministrisë së Pushtetit Lokal, e cila ia paraqet pastaj Ministrisë së Financave."

Neni 8

Neni 13 ndryshohet si vijon:

"Ministria e Financave në bashkëpunim me Ministrinë e Pushtetit Lokal përgatit udhëzimet dhe aktet e tjera nënligjore, të nevojshme për hartimin e projektbuxhetit lokal dhe udhëheq procesin e hartimit të këtij buxheti."

Neni 9

Neni 14 ndryshohet si vijon:

"Buxheti lokal zbatohet nga kryetari i këshillit të rrethit, kryetari i bashkisë, kryetari i komunës dhe administrara e tij, sipas vendimit të këshillit përkatës."

Neni 10

Neni 15 ndryshohet si vijon:

"Urdhëruesit kryesorë të fondeve të buxhetit lokal janë:

- për komunën: kryetari i komunës
- për bashkinë: kryetari i bashkisë
- për rrethin: kryetari i këshillit të rrethit

Urdhëruesit e shkallës së dytë dhe të tretë, në përputhje me dispozitat ligjore, janë drejtuesit e ndërmarrjeve dhe institucioneve publike lokale, në rast se autorizohen nga urdhëruesit kryesorë."

Neni 11

Neni 16 ndryshohet si vijon:

"Të gjitha të ardhurat dhe shpenzimet e buxheteve të organeve të pushtetit lokal regjistrohen nëpërmjet llogarive të institucioneve, të përcaktuara nga Ministria e Financave dhe kontrollohen, sipas

procedurave të përcaktuara me ligj. Shërbimi i arkës për buxhetin lokal kryhet nga banka e autorizuar nga Drejtoria e Thesarit."

Neni 12

Neni 17 ndryshohet si vijon:

"Kontrolli i buxhetit lokal në organet e pushtetit lokal kryhet rregullisht jo më pak se një herë në vit nga prefektura dhe organet e ngarkuara nga këshillat përkatës.

Kontrolli i buxhetit të pushtetit lokal kryhet edhe nga organet e caktuara me ligj, si Ministria e Financave, Ministria e Pushtetit Lokal dhe Kontrolli i Lartë i Shtetit."

Neni 13

Neni 18 ndryshohet si vijon:

"Këshillat lokale gjatë vitit buxhetor, mund të vendosin për ndryshime në treguesit e buxhetit lokal të pavarur dhe të propozojnë ndryshime të treguesve të buxhetit të shtetit."

Neni 14

Neni 20 ndryshohet si vijon:

"Ministria e Financave, me propozimin e Ministrisë së Pushtetit Lokal, kur gjykohet e nevojshme gjatë vitit buxhetor, mund të transferojë fondet e buxhetit të shtetit (që bëjnë pjesë në buxhetin lokal të organit të pushtetit lokal) në një organ tjetër të pushtetit lokal, pasi të jetë marrë më parë miratimi i këshillit të organit të pushtetit lokal që disponon fondet."

Neni 15

Neni 22 ndryshohet si vijon:

"Fondet e buxhetit lokal, të përmendura në nenin 6, pikat "a" dhe "b", të papërdorura gjatë vitit buxhetor, mbarten në vitin e ardhshëm buxhetor. Fondet buxhetore me destinacion të papërdorura gjatë vitit nga organet e pushtetit lokal, kalojnë në favor të shtetit."

Neni 16

Neni 23 ndryshohet si vijon:

"Çdo urdhërues buxhetor detyrohet të marrë masat e nevojshme, që sigurojnë realizimin e buxhetit, sipas strukturave dhe klasifikimit buxhetor. Periodikisht dhe në fund të vitit buxhetor urdhëruesit kryesorë i raportojnë këshillave përkatës të organeve të pushtetit lokal për zbatimin e buxhetit të tyre përkatësisht në komunë, bashki e rreth. Gjithashtu, ata i raportojnë prefekturës, Ministrisë së Pushtetit Lokal dhe Ministrisë së Financave për fondet e dhëna nga buxheti i shtetit."

Neni 17

Neni 24 ndryshohet si vijon:

"Urdhëruesit buxhetorë dhe punonjësit e ngarkuar me zbatimin e buxhetit në organet e pushtetit lokal, mbajnë përgjegjësi për realizimin me korrektësi të buxhetit lokal dhe respektimin e afateve të caktuara nga ky ligj dhe aktet përkatëse nënligjore. Shkeljet e mëposhtme, kur nuk formojnë vepër penale, përbëjnë kundërvajtje administrative:

1. Mosrespektimi i afateve, procedurave dhe kushteve të parashikuara sipas neneve 11 dhe 16.
2. Përdorimi i fondeve në kundërshtim me kushtet e parashikuara në nenet 18 dhe 23.

Neni 18

Pas nenit 24 shtohet neni 24/1 me këtë përmbajtje:

"Neni 24/1

Për kundërvajtjet administrative të parashikuara në nenin 24, përveç shpërblimit të dëmit të shkaktuar, ndaj kundërvajtësve jepet dënim administrativ me gjobë nga 5 mijë lekë deri në 50 000 lekë.

Dënimi administrativ me gjobë vendoset nga organet e kontrollit të parashikuara në nenin 17.

Procedurat, afatet dhe mënyra e konstatimit, të shqyrtimit, të ankimit dhe të ekzekutimit të dënimeve administrative bëhen në përputhje me ligjin nr.7697, datë 7.4.1993 "Për kundërvajtjet administrative."

Neni 19

Neni 25 ndryshohet si vijon:

"Këshilli i komunës, i bashkisë dhe i rrethit, pasi shqyrtojnë zbatimin e buxhetit të tyre, miratojnë buxhetin faktik dhe, brenda datës 15 mars, e depozitojnë pranë prefekturës përkatëse.

Ministria e Pushtetit Lokal dërgon brenda muajit prill në Ministrinë e Financave buxhetet faktike të të gjitha organeve të pushtetit lokal."

Neni 20

Neni 26 ndryshohet si vijon:

"Ngarkohen Këshilli i Ministrave, Ministria e Financave dhe Ministria e Pushtetit Lokal të nxjerrin aktet nënligjore në zbatim të këtij ligji."

Neni 21

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.2217, datë 15.9.1998 të Presidentit të Republikës së Shqipërisë, Rexhep Meidani